

بِسْمِ اللَّهِ الرَّحْمَنِ الرَّحِيمِ

# Khutba Jummah

HAZRAT MUHYI-UD-DIN AL-KHALIFATULLAH

*Munir Ahmad Azim*

18 Mars 2016 ~  
(08 Jamad'ul Aakhir 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lors « **Délaisse Matérialisme pour Le Zikr d'Allah** »:

## DÉLAISSE MATÉRIALISME POUR LE ZIKR D'ALLAH

يَتَأَيُّهَا الَّذِينَ ءَامَنُوا لَا تُلْهِكُمْ أَمْوَالُكُمْ وَلَا أَوْلَادُكُمْ عَنْ ذِكْرِ اللَّهِ وَمَنْ  
يَفْعَلْ ذَلِكَ فَأُولَئِكَ هُمُ الْخَاسِرُونَ ﴿١٠﴾

Yaaa-'ayyuhallaziina 'aamanuu laa tul-hikum 'amwaalukum wa laaa 'aw-laadukum 'an Zikrillaah. Wa mayy-yaf-'al zaalika fa-'ulaaa-'ika humul-khaasiruun.

« Ô bane Croyants ! Pas laisse ou di biens, et ou zenfants distraire ou, et faire ou oublier rappel Allah. Bane ki faire sa, zot pou dans la perte. » (Al-Munafiqun 63: 10).

فَاعْرِضْ عَنْ مَنْ تَوَلَّىٰ عَنْ ذِكْرِنَا وَلَمْ يُرِدْ إِلَّا الْحَيَاةَ الدُّنْيَا ﴿١٠﴾  
ذَٰلِكَ مَبْلَغُهُمْ مِّنَ الْعِلْمِ إِنَّ رَبَّكَ هُوَ أَعْلَمُ بِمَنْ ضَلَّ عَنْ سَبِيلِهِ وَهُوَ  
أَعْلَمُ بِمَنْ أَهْتَدَىٰ ﴿١١﴾

Fa-'a'-rid 'amman-tawallaa 'an-zikri-naa wa lam yurid 'illal-hayaatad-dunyaa. Zaalika mab-laghuhum-minal-'ilm. 'Inna Rabbaka Huwa 'a'-lamu biman-dalla 'an-sabiilihii wa Huwa 'a'-lamu bi manih-tadaa.

« *Écarte-toi donc, de celui ki tourne lé dos à Nous rappel et ki content seulement la vie lor la terre. Sa, c'est limite zot connaissance. Et c'est To Maître ki pli conné ki sanlà fine égarer de So chemin, et plus conner ki sanlà suive chemin droite.* » (An-Najm 53: 30-31).

En vérité, le Rappel d'Allah (*Zikr-é-Ilaahi* ou *Zikrullah*) c'est la nourriture de nous l'âme. L'âme li ene tél être ki ena ene lien ki attache li avec so Créateur et de ce fait, pour préserve sa lien ki existé entre l'âme et le Créateur, l'homme bizin faire zeffore pou faire bane louanges d'Allah et pou rappelle Allah, pou médite lors So toute puissance et de So l'amour et miséricorde ki Li (Allah) ena envers l'homme dans tous bane sphères de so la vie afin ki li reste connecté avec Allah.

Abu Musa Ash'ari (ra) fine rapporté ki le Prophète d'Allah Hazrat Muhammad (saws) fine dire : « *Celui ki pratique le Zikr d'Allah et celui ki pas pratique li (le Zikr) zot l'exemple c'est couma ene vivant et ene mort.* » (Bukhari).

Zot bizin rappelle zot souvent de Allah, et Allah en retour pou mazine zot. De ce fait couma Allah fine dire dans premier verset ki mo fine récité avec zot, Allah oulé ki So bane serviteurs mazine Li, et par sa moyen là zot illumine zot l'existence avec récitation de So bane attributs et So bane louanges, en méditant lor So grandeur, So l'unicité et So toute puissance afin ki li (sa dimoune là) reste toujours sous la protection d'Allah, et ki Allah accorde li So bane faveurs et So l'amour afin ki Li capave vivre ene la vie remplie et accomplie ; en somme, afin ki li rempli le devoir ki li ena envers Allah, c'est-à-dire, pou adore Li sans associer nannié avec Li, et pou adore Li en restant toujours connecté avec Li.

C'est pour sa ki Allah adresse Li principalement à bane croyants et mette zot en garde pou pas laisse quoique ce soit ou quique ce soit dévier zot de Zikr d'Allah, de So rappel. Faudé pas ki nous bane di biens et nous zenfants faire nous oublier nous l'adoration (*Ibaadat*) d'Allah. Le verset en question dire « *ou di biens* » avant mentionne « *ou zenfants* » et sa c'est parski bane dimounes zot bien pli préoccupé dans galoupe derrière bane di biens mondaines et alors zot priorité c'est gagne maximum di biens, et c'est après ki l'affection pou zot bane zenfants rentre en jeu.

L'amour pour l'argent reste malheureusement prédominant dans le monde kot nous pé vivre. Dans bane les autres versets ki mo fine cité (dans Surah An-Najm), Allah oulé attire nous l'attention lors sa bane dimounes, ki quoi-ki zot ena bél bél connaissances mais zot servi sa seulement pou gagne bane di biens matériels de sa le monde temporaire là. En examinant sa le monde là, zot pou trouver ki bane dimounes servi de zot bane connaissances seulement pour accapare zot de bane di biens mondaines. Zot envahi par le besoin pou enrichi zot matériellement et zot oublier zot devoir spirituel. De ce fait, zot laisse zot embété par l'aspé irréelle (temporaire) de sa lé monde matériel là et zot oublier la beauté de lé monde spirituel. Le Quran Shareef enseigne nous pou évite sa bane dimounes ki l'objectif de zot bane

connaissances c'est seulement pou enrichi zot nék de côté matériel et li (Quran) explique nous ki faire nous bizin reste loin de sa bane kalité dimounes là.

Quant à bane zenfants, quoi-ki zot reste à l'arrière-plan pour certains dimounes, mais selman, faut dire, ki ena bane dimounes ki vraiment content zot bane zenfants et zot attaché avec sa bane zenfants là, à tel point ki l'amour et bane l'heures temps ki zot consacré à sa bane zenfants là zot bien plus grand ki bane l'heures temps ki zot passer dans mazine Allah, dans le Zikr d'Allah. Nous pé vive dans ene tél siècle kot même bane madames et bane missiés travaille. Mo comprend très bien ki li parfois nécessaire pou certains couples pou travaille, vu la situation financière dans ki zot trouve zot – kot zot ena pou honore (rembourse) bane dettes et zoine dé boutes. De ce fait, mo pas pé pointe lé doigt vers bane ki vraiment dans ene situation financière difficile, mais seulement vers bane, ki zot financièrement aizé, et ki zot pas ena réellement le besoin pou travaille.

Dans zot l'élan pou alle en quête de bane richesses mondaines, sa bane dimounes là confié zot bane zenfants à bane nourrices ou bane baby-sitters pour surveillance et occupe sa bane zenfants dans zot l'absence. Sa li vraiment ene situation malheureux parski zot pas vraiment oblizé travaille, surtout bane mamans de bane familles aizé, kot sa bane femmes là zot délaisse zot foyers pour alle en quête de bane richesses matérielles et de ce fait, sa bane zenfants là zot privé de bane guides, de zot bane parents et zot laisse zot piézé par bane les autres dimounes et zot délaisse la religion d'Allah pour attrape matérialisme et ene la vie ki dévié complètement de la religion.

Bane séquelles de sa bane situations là à travers le monde zot bien graves. Sa bane dimounes là zot coupé de nous Créateur et zot vivre exclusivement, zis pour gagne bane di biens de sa lé monde là.

Abu Huraira (ra) fine rapporté ki le Messenger d'Allah, Hazrat Muhammad (saws) fine dire: « *Tout rassemblement kot bane dimounes zot assizé et zot pas fer le Zikr d'Allah et zot pas envoye Darood lors zot Prophète, c'est ene perte pour zot. Si Allah oulé, Li puni zot, si Li oulé, Li pardonne zot.* (Tirmidhi)

Pareil couma sa bane versets Quran et Hadith ki mo fine cité là pé dire, nous bizin éloigne nous de sa bane dimounes ki préfère oublier Allah, de peur ki nous retrouve nous dans même situation ki zot. Faudé pas ki nous penser ki nous ena kit l'esprit de vengeance contre zot ou sois nous pé boycotte zot. Non. Faudé pas nous confondre en aucaine façon boycotte ki bane l'ennemies de bane Messagers d'Allah metté lors bane Messagers d'Allah et lors zot bane disciples kot sa bane serviteurs d'Allah là subir tous sa là pour l'amour d'Allah. Alors faudé pas nous confondre sa kalité boycotte ki exister dans l'époque de bane Messagers d'Allah et la distance ki bane vrais croyants bizin prend envers bane ki fine plonge zot complètement dans le bain du matérialisme à ene tel point ki zot oublier Allah. Et sa veut en aucaine cas dire aussi ki si

sa bane dimounes là saluer ou, faire ou ene *salaam*, ou tourne ou lé dos avec zot et ou rejette zot bane *salaam* ! Non, non et non !

Sa bane versets là enseigne nous ki si sa bane dimounes là zot plongé dans le matérialisme à ene tel point ki zot oublier mazine Allah (zot oublier faire Zikr Allah), alors faudé pas ki nous, bane croyants suive zot l'exemples, c'est-à-dire, faudé pas nous imite zot dans zot recherches pou gagne bane richesses mondaines, et nous faire sa seulement pou protége nous de sa contamination là, de sa soif pou gagne plisse l'argent et pouvoir matériel là. Et donc, afin pou protéze nous lien envers nous Créateur, nous bizin évite pou fréquente sa bane dimounes ki trop plonger dans sa le monde matériel là, sa bane kalité dimounes ki fine oublier Allah.

Protection de nous propre être pou préserve nous pou l'adoration d'Allah, c'est sa même l'essence de *Zikr-é-Ilaahi*. *Zikr-é-Ilaahi* li en vérité ene acte d'adoration (ene acte d'*Ibaadat*). Alors couma eski ene dimoune ki fine plonge li complètement dans *Zikr-é-Ilaahi* capave assizé dans ene l'assemblée kot pé discute couma pou rode encore plisse richesses matérielle, et kot l'enthousiasme pou gagne bane di biens et pouvoirs mondaines atteindre so sommet aussitôt ki sa bane dimounes là cause à propos de bane zaffaires ki concerne l'argent ?

Ou, ki content Allah, et ki adore Li, eski ou pas pou ena ene rémor de conscience si ou arrive trouve ou dans sa kalité l'assemblée ou compagnie là ? Eski ou pas pou peur ki attention ou attire la colère d'Allah lors ou même ? Pé demande ou ici pou seulement coupe ou contacte avec sa bane kalité dimounes ki capave fer ou dévier de ou l'objectif – c'est-à-dire le *Zikr-é-Ilaahi* à moins ki zot change sujets de zot conversation et zot commence cause bane causé ki concerne Allah et ki zot accepter tous So bane l'enseignements, sans ki zot objecter ou sois zot juge lors bane décisions ou bane décrets d'Allah. Nous bizin alors très sélectif quand il s'agi pou organise nous bane réunions et nous bane congrégations. Sa c'est bane miroirs ki refléter saki nous été, et faire nous trouve saki nous été vraiment, et faire nous trouve le profond de nous lé cœur.

Mo l'attention aussi attiré lors sa bane dimounes ki fréquente seulement sa bane dimounes ki vivre dans bane richesses extrêmes là. Zot péna aucaine lien d'affection avec sa bane dimounes riches là. Zot faire sa seulement pou gagne ene statut dans la société, et pou flatte zot ego. Ena aussi bane tels famille bien riches même ki zot façon raisonner, zot mauvais goût et zot recherche d'intérêt personnel li tellement de mauvais goût ki sa pou ene punition, ene zaffaire insupportable pou ene dimoune pou reste même quelques minutes dans zot compagnie. C'est sa bane kalité dimounes ki trop plonger dans bane zaffaires de sa le monde là ki sa bane versets Quran Shareef ki mo fine cité là pé faire nous comprendre, et ki Allah pé demande nous pou éviter. Zot l'intérêt pas pareil couma saki pou nous, parski nous, nous désire seulement faire plaisir Allah, tandique ki zot, zot mort pou sa lé monde là, zot nek rode gagne plisse bane plaisirs de sa lé monde temporaire là.

Ene dimoune ki nek pense lors So Créateur n'importe kot sa kot li trouve li pou recevoir de Allah plusieurs bane bénédictions. Sa faire moi mazine ene anecdote au temps de Imam Ahmad Ibn Hanbal (*Rahimullah Alayh*). Ene jour, Imam Ahmad ti bizin alle dans ene l'endroit, et alors en chemin kan la nuit fine arriver, li fine décider pou alle dormi dans ene Masjid. Kan li fine arrive devant ene Masjid pou rentrer, gardien de sa Masjid là fine arrête li, et pas fine reconnaite li et fine empêche li rentre dans Masjid. Imam Ahmad pas fine dire li nannié ki sanlà li été, et alors li fine décider pou alle dormi dehors dans la cour Masjid là, mais gardien là ti bien en colère et fine pousse li dehors, fine traine li dehors ziska dans la rue. Ene boulanger ki so boulangerie ti près avec Masjid là fine trouve sa et fine gagne pitié de Imam Ahmad sans pourtant reconnaite ki sanlà li été, et fine invite li pou passe la nuit dans so boulangerie.

Kan li fine reste en compagnie de sa boulanger là, Imam Ahmad fine remarquer ki boulanger là fine passe la nuit dans travaille, c'est-à-dire, cuit dipain, mais saki fine étonne li bien bien plisse encore, c'est ki sa dimoune là en question ti pé faire bane louanges d'Allah tout en travaillant, sans arrêter pendant toute la nuit ziska le lendemain, avant lever soleil. Imam Ahmad fine bien impressionné, émerveillé par tout saki li fine trouver et li fine pose boulanger là question si pas li fine recevoir kit faveur de Allah pou tout bane louanges ki li fine adresse à Allah. Alors boulanger là fine révèle li ki Allah tous les temps exauce so bane *duahs*, so bane supplications sauf ene sel ! Alors, Imam Ahmad fine étonner et fine demande li ki sa requête ki Allah pas encore accorde li là. Alors boulanger là dire li ki depuis lontan li ti envie rencontre le fameux Imam Ahmad (ibn Hanbal) mais ki sa requête pas fine exaucée. Alors, la voix remplie avec l'émotion, Imam Ahmad fine révèle so identité à sa boulanger là et fine dire li ki sa pas ene coïncidence di tout ki li fine être trainé dépi Masjid pou arrive devant la porte de sa boulanger là parski Allah fine oulé exauce *duah* de So serviteur (boulanger là) kot pou exauce sa *duah* là, Li fine traine Imam Ahmad littéralement ziska amène li devant la porte de sa dimoune là !

D'ailleurs dans ene Hadith (Qudsi), le Prophète d'Allah (saws) fine certifié ki Allah fine proclamé ki celui ki bouge so la lèvres pour faire So Zikr (pour mazine Li), alors Allah affirmé ki Li avec sa dimoune là. (Bukhari)

De plusse, sa anecdote ki fine arriver bien lontan de sa, parmi tant d'autres, faire nous comprend ki c'est pas seulement dans Masjid ki ene croyant capave atteindre Allah; Masjid li pas seul l'endroit ki ene kikaine capave bane bénédictions illimité d'Allah. Zot bizin conner aussi ki le *Zikr-é-Ilaahi* ena ene très grand lien avec *Istighfaar* (le pardon) et ki tous les deux propulse celui ki ena *Imaan* (le croyant) à ene grade bien supérieur si li constant et sincère dans so quête pou gagne le plaisir et la proximité d'Allah. Allah content bane ki content Li, Li reste proche avec bane ki oulé reste proche avec Li, ki oulé Li, et alors Li exauce zot bane *duahs*. Dans anecdote ki mo fine raconte zot, Imam Ahmad, quoi-ki li ti ene serviteur très aimé d'Allah, li fine trouve li subir ene maltraitance (de la part de sa gardien là) pour ki li gagne la chance pou rencontre ene l'autre serviteur bien aimé d'Allah, ene tel serviteur ki fine trace so la vie entier, ziska même dans so lieu de travail lors le Rappel d'Allah (*Zikrullah*) et kot Allah fine oulé absolument exauce so *duah* et faire li rencontre Imam Ahmad et fine traine Imam Ahmad littéralement ziska li !

Lors sa sujet de *Zikr-é-Ilaahi* là le Messie Promis Hazrat Mirza Ghulam Ahmad (as) fine dire: *Sa dimoune ki nek trouve Allah devant li tous les temps pas pou ozé faire bane erreurs. Li pou tous les temps maziné ki li ena devant li ene surveillant – ene Être ki bien pli puissant ki li et ki ena le pouvoir pou puni li. C'est bien nous éloignement avec Allah ki engage nous dans bane péchés. Si sa éloignement là li seulement temporaire, nous bane péchés aussi pou temporaire. Mais si li vine permanent alors nous pou vine bane pécheurs éternels. Sak l'heure, sak moment Allah péquette nous et pé surveillance nous. Couma eski nous pou capave ozé commette bane péchés?*

Le *Zikr-é-Ilaahi* ena sa l'avantage là kot li faire nous vivre sous le regard d'Allah, et li écarte nous de bane mals de sa lé monde là. Bane zaffaires mondaines faudé pas détourne nous de nous l'adoration d'Allah. Quel que soit bane zaffaires ki pé préoccupe nous dans sa lé monde ici-bas là, ki li bane transactions commerciales, agricoles ou lézot kitchoses, le *Zikr-é-Ilaahi* bizin trouve so place. Suive l'exemple de sa boulanger là, ki malgré so l'apparence ordinaire, kot li pé fer so travail même pareil couma tout dimounes, mais selman li fine trouve li gagne ene place très élevée dans l'estime d'Allah à tel point ki Allah exauce pou li tous so bane requêtes (duaahs, supplications) à cause même en travaillant, li pas délaisse mazine Allah (*Zikr Allah*)! Sa l'exemple ki mo fine cité là donne nous ene l'idée ki travail mondaine ki nous faire pour subvenir à nous bane besoins li alors pas ene excuse pour oublier Allah (travail là vine couma ene champ ki fine parfumé par le *Zikr d'Allah*). Au contraire, plus zot pou mazine Allah, pli Allah pou rapproche Li de zot.

Le *Zikr-é-Ilaahi* apporte nous bane l'avantages ki bien au-delà de nous l'espérance. Nous bizin alors pense à Allah dans tout saki nous pé faire, et c'est ainsi ki nous pou capave espérer pou reforme le monde. Invite bane dimounes vers Allah, vers So Rappel (*Zikr*). Cause avec zot à propos d'Allah, de So grandeur, de So beauté, de So bane faveurs et médite zot aussi lors Li (Allah). C'est coumsa ki ene véritable lien et ene l'amour profond pou tisser entre Li et zot, et sa l'union là pou éternelle.

Anou enrichi nous bane prières quotidiens, nous bane *Salaat*, par le *Zikr-é-Ilaahi*. Nous bane *Namaz* (*Salaat*) bizin rempli avec *Zikrullah*, sinon sa bane *Salaat* là pou pareil couma bane terrains arides et ki pas fertiles. Ki Allah accorde zot mo bane chers frères, sœurs et zenfants musulmans et ki sincères dans zot quête, pou gagne la capacité pou maintenir sa lien solide là avec Allah à travers le *Zikrullah* (Rappel d'Allah). *Ameen*.